

弘

簡

錄

弘簡錄卷二百十九

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主八之下

宣宗興定三年正月丙子定鎮戍征行官減資歷月日格戊寅議行均輸稅民種地畝勅和市邊城軍需無至亂民壬午大雪命停葺器物庫廡舍丁夫免單丁民戶月輸軍需錢丙戌紇石烈牙吾塔伐宋奏捷上語侍臣此事朕豈得已近日遣使質欲講和彼既不從安得不用兵也時元兵已定太原河北事勢難料集百官議備禦長久之計胥鼎上言沿邊州府官至于掌兵及守禦邊隘者征行暴露備歷艱險一體減定資歷年月以示激勸其近制軍前立功犯罪之人行院帥府不得輒行誅賞此

見朝廷至意賞由中出示恩有歸可從至於部分失律主將不得卽治其罪則將權太輕下無所畏而令莫得行矣上以問樞密對如鼎言乃詔自今四品以下皆得專決丁酉鄧州帥府提控婁室有罪滅死削爵二月丙午上語宰臣江淮之人號稱慙弱自官軍攻蔓菁峒其衆困甚脅之無一肯降我蒙河朔州郡一遇北警往往出降誠爲可嘆已酉白撒已得鳳州取武休關將遂取獨詔尚書省議朕意殊不然假令得之亦何可守此舉蓋爲宋人渝盟初豈貪其土地邪朕重惜生靈惟和議早成爲佳爾已未諸將奏捷僕散安貞入宋境破梁縣等軍擒統制李申之完顏賽不牙吾塔破白石關平山砦陝西兵破虎頭關取興元洋州上聞大悅三月庚午又破宋人于七口倉甲戌高麗表言先請朝貢今道路不通請俟平定後議通款命行省姑示

鞬縻勿絕其好已卯提控與屯吾里不敗宋人于上津縣軍還
至濠州宋人來拒牙吾塔擊走之丙戌安貞破宋人于石塢山
辛卯又敗之于塗山壬辰賽不敗之于老口鎮又敗之于石鵝
崖時太原等路州縣各闕正官令民推其所愛爲長從行省量
與職任及運解鹽入陝西以濟調度命符鼎兼領其事其朝廷
已授者別議任使閏月壬寅叛賊王公嘉構宋人取沂州丁未
諭樞密院議晉安東平河中諸郡備兵之策辛亥少府少監粘
剌校失言利害七事甲寅以南伐師還罷南邊州郡籍民爲兵
戊午夏人破葭州之通秦砦刺史紘石烈王家奴戰沒壬戌治
書侍御史蒲魯虎上書請遷太子師傅甲子賞南伐功符鼎等
各遷官四月丙寅朔裕宿等州置元帥府遷陝西步騎精銳六
千人實京兆戊辰遷精銳六萬分屯平涼涇邠乾耀等州庚午

以秦州防禦使女奚烈古里問行元帥府于平涼罷募民運解
鹽築京師裏城命侯摯董役高琪總監之募人能致錢五十萬
者遷一官百萬仍升一等平陽判官完顏阿剌左府譏察霍定
和發宋蔡京故居得二百萬有奇准格遷賞甲戌以知臨洮府
事石蓋合喜爲鞏州行元帥府左都監癸未陝西黑風晝起有
聲如雷地大震乙酉夏人據通秦寨提控納合買住擊敗之已
丑論林州都統霍成以疑貳誣殺降人當死元帥惟良不欲因
敵人誅邊將請寬其罰仍請立護送降民賞格護送十人以上
至者遷一官五十人以上兩官百人以上兩官雜班任使不及
者每名賞錢二百緡詔從之庚寅高汝礪請備防秋糧宜及年
豐於河南州郡驗直立式募民入粟上與議定其法而行之五
月乙未朔鳳翔元帥府遣兵敗宋人于黃牛等堡六月甲子朔

時暑給脩城夫病者藥餌甲戌李全寇日照博興紇石烈萬奴
敗之寇卽墨完顏僧壽又敗之遂復萊州戊寅曲赦河東南北
路詔陝西簽軍如河南例丁亥命防禦使徒單福定等帥所部
義軍與沂州民老幼盡徙于邳戊子遼州總領提控唐括猗兒
帥師復太原府詔右司諫郭著撫諭其軍民七月丁酉籍邳海
等州義軍脅從歸國人給地三十畝有力者五十畝仍蠲差稅
充軍者日支糧二升號決勝軍時襄城功未畢尚書欲增調民
上慮妨農并糧儲不繼論樞臣言是役之興實爲大計今功已
過半偶值霖潦成功差遲所議增丁夫勢必驗口不令妨業比
及防秋當告成矣卿等普爲計畫無貽朕憂庚子平涼等處地
震遣徒單思忠祭地祇于上清宮曲赦陝西山東西路甲辰置
京東西南三路行三司勸民種麥無種粒者貸之八月戊辰遣

禮書楊雲翼祭社稷侍讀學士趙秉文祭后土于河中府時處分尚書事或至數日不奉行上謂大臣容有遺忘左右司玩弛臺臣常糾乃定御史上下半月勾檢省中制勅文字今後復爾併罪卿等壬申元兵下武州軍事判官郭秀死之丁丑緩在京差徭中山治中王善殺權知府事李仲等以叛庚辰元兵下合河縣縣令喬天翼等死之乙酉命樞密遣官簡嶺外諸軍之武健者養之彭德那洛衛濬懷孟等城弱者罷遣九月甲午詔單州經略使完顏仲屯宿州與右都監紇石烈德同行帥府事丙申唐州從宜夾谷天成敗宋人于桐栢丁酉尚書省請申命侯摯廣營積貯上曰徵歛已多今更規畫不過強取於民防秋稍緩當量減戍兵用度幸足何至是耶不許十月乙丑平涼府先以地震被命醮祭方行事慶雲見以圖來上遣官覆驗得實遣

告太廟百官奉表稱賀詔中外已卯元兵次單州境詔諸路民應遷避兵而不欲者亟遣人以利害曉之癸未襄城畢工百官稱賀宴宰臣便殿仍建碑于會朝門遷摯一官賜琪汝礪思忠金鼎各一重幣三丁亥天兵屯綿上壬辰命有司葺閤舍給薪米以濟貧民期明年二月罷俟時平則贍之以爲常十一月癸巳朔前嵐州倉使張祐自夏國來歸己亥元兵徇彰德府辛丑詔朝官七品外路六品以上官歲舉縣令一人上開戶部令史蘇唐催封丘租期限迫促民有刈生禾來輸者遣吏按問杖唐五十縣令高希隆減二等甲寅徐州總領納合六哥大破紅襖賊于秋山禮部郎中抹撚胡魯刺上疏言時事丁巳高琪下獄秦安軍副使張天翼爲賊張林所執以歸宋繁之楚州至是逃歸授睢州刺史戊午元兵平晉安府十二月誅琪

四年正月壬辰朔詔免朝丁酉元兵下奸義堡庚戌宋步騎十萬圍鄧州聞援軍至夜焚營去招撫副使木虎移刺蒼追及之奪其俘還壬子晝晦有頃大雷電雨以風癸丑戶部侍郎張師魯上書請遣騎兵數千及春淮蜀並進以撓宋三月癸卯長春節免朝乙巳林州元帥惟良擒叛人單仲李俊誅之降其黨盧廣已酉南京兵馬使木甲賽也行懷孟帥府事壬子經略使完顏陳兒擊敗紅襖賊于忙兒復取海州四月癸亥安武軍節度使柴茂破紅襖賊于棗強邠州經略使段增順破叛賊甄全于唐縣夏人犯邊元帥石蓋合喜破之戊辰禘于太廟元遣趙瑞攻孟州提控魯德王安復大名府庚辰京平帥府總領提控蒲察山兒破紅襖賊于聊城五月癸巳紅襖賊寇樂陵監山橫海節度使王福連擊敗之張聚來寇又敗之甲午上擊鞠于臨武

殿癸卯元兵徇懷州丙辰徇兗州秦定軍節度使完顏畏可死
之六月京畿不雨勅有司闕獄雜犯以下釋之丁丑元遣楊在
攻下大名又攻開州及東月長垣等縣己卯祈雨庚辰宋方子
忻來歸命有司若不善視或德必歸漏泄機事其增廩優遇處
之鄭州七月辛卯兩宋人及紅襖賊犯河朔諸郡皆降獨滄州
經略使王福固守會益都賊張林來攻福乃叛降林帥府請討
之癸丑林州行元帥府遣總領嚴祿等討紅襖賊于彰德府生
擒僞安撫使王九甲寅遣烏古論仲端等使于元八月戊午朔
嚴實戍江王贊據濟南山東招撫高居實遣人招嚴實于青崖
砦獲其款以聞李全犯東平府監軍王庭玉敗之擒其僞安撫
軍節度使張林庚申上諭樞密頴州民渡淮爲宋軍者凡十村
可追索主者懲一二以誡其餘庚午夏人陷會州刺史烏古論

世顯降甲戌陝西行省報龜谷敗夏人之捷乙亥上諭宰臣河南水災唐郛尤甚悉除其租餘順成之方止責正供免和糴雜徵折輸桑皮故紙流民佃荒田者如上優免丙子陝西行省與夏人議和戊寅定選補親軍法造官于河南陝西選之己卯罷葭州招撫司丙戌徙隨路諸軍戶于河南京東西南路各設檢察使副九月辛卯進章宗寶錄戊戌元木華里屯軍真定置總領元帥府于歸德以壽州陳留兩鎮兵屬之壬寅宋人屯皂郊堡行軍提控完顏益都擊敗之元遣塔忽等來癸卯夏人來侵甲辰滕州招捕提控夏義勇討紅襖賊敗之己酉夏人陷西寧州尚書省都事僕散奴失不坐誅駙馬都尉徒單壽春奪官一階杖六十甲寅宋人出秦州及夏人來侵丙辰鞏州行元帥府事石盞合喜報定西州之捷十月壬戌元遣蒙古塔忽訛里

刺等來已卯陝西東路行省報緜德州之捷紅襖賊一月四寇
泗州掠人畜而去癸未京西山寨各設守禦使副令本路帥府
總之諭陝西行省圖復會州十一月戊子黃陵峒經畧使烏古
論石虎等以戰陣失律伏誅甲午河南水道官勸課更浮山縣
名忠孝乙巳詔柴茂權真定行元帥府左都監蓋仁貴攝右都
監元木華里國王引兵圍東平十二月甲戌祁雪禮部郎中權
左司諫抹撻胡魯刺上封事庚戌臘享于太廟乙酉鎮南軍節
度使溫迺罕思敬上書言錢幣稅賦二事

五年正月丙戌朔免朝壬辰議禦西夏及征南事諭皇太子以
東平禦敵方畧甲午諭樞密院南伐事常詳議其便丁酉元兵
攻天井關戊戌宋人襲泗州西城提控王祿死之乙巳詔諸道
共集蔡州庚戌山東行省報東平之捷二月丙辰朔置招撫司

于單州曲赦東平府庚申下詔伐宋以內族惟弼權中京行院
同簽樞密事幹勸合打權蔡息行元帥府右都監納合降福權
宿州行院簽樞密事李木魯達阿權唐鄧行元帥府右都監完
顏訛論副右都監戊辰罷慎州行元帥府復置招撫司與孟州
經畧司並受中京行樞密院節制癸未以旱災詔中外赦河南
路三月丙戌朔上御仁安殿祈雨仍望祭于北郊庚寅宋人圍
唐鄧完顏訛論力戰却之前鄧州千戶李木魯毛良虎自拔歸
國訛論以便宜選三官授唐州同知乙未罷河南路行三司丙
申進徒單思忠尚書右丞兼脩國史以太子詹事僕散毅夫叅
知政事上以近侍局多不留心采訪外事命宰臣照章宗時秩
滿以所采事定升降預爲攷覈之法以激勸之己亥叛民竇趙
兒招夏人八據來羗城李木魯合住誘以重賞脅從人爲內應

督兵悉攻城拔之庚子賜林州行元帥府經歷官康瑀進士及第丙午築壇祀雷雨師壬子雨五月戊戌宋人據楚兵官軍復之庚子納蘭記僧伏誅告人趙銳升職四等七月己亥義勇軍叛據碭山縣詔增給徐州清口等處戍兵衣糧辛亥單州招撫劉瓊乞移河南糧濟其軍詔給之八月壬子朔罷黃陵峒招撫司上諭尚書省碭山叛軍家屬囚歸德旬餘不給糧恐傷其生又諭樞密河北艱食民欲南來者日益多速令渡之毋致殍死癸亥林懷帥府邀擊紅襖賊于伏恩村敗之甲子詔南征潰軍復歸而能力戰者依出界立功格給賞乙丑宋人掠沈丘殺縣令九月甲申京東歲饑多盜遣御史大夫紇石烈胡失門爲宣慰使往撫安之丁亥詔州府及軍官捕盜慢職四品以下宣慰使決之三品以上奏裁戊子增授隰州招撫使軒成官改授西

省節制十月癸丑命僕散毅夫行尚書省于京東督諸軍芻糧
乙卯太醫侯濟張子英治皇孫疾不療罪當死上不忍命杖七
十除名戊午遣親軍討河南羣盜辛酉元兵攻緱德州丁卯夏
人犯定西積石之境戊寅分京畿戍卒萬二千河中民兵八千
將以許州元帥紇石烈鶴壽屯潼關西十一月癸未陝西東路
行省報安塞堡敗夏人之捷太子親王百官表賀却之甲申諭
太府減損食品庚寅募民興南陽水田乙未夏人復攻兪谷宋
人攻靳縣紅襖賊掠宿州辛丑詔蠲徐邳宿泗等州逋租歸德
亳州穎州停閣逋戶租外仍蠲三之一逋戶田廬有司募民承業
禁其毀損以俟來復有能墾闢閒田除其科稅蒲城縣民李文
秀等謀反伏誅壬寅宋人焚穎州執防禦判官而去元兵攻延
安元帥合達買住及其將士擊敗之加賜賞賚仍下詔獎諭十

二月辛亥朔元兵下潼關詔省院議禦備壬子罷併舉縣令法

丁巳禮部侍郎烏古孫仲端翰林待制安庭珍使北還各遷

階庚申罷河南義軍丁卯罷新舊民軍減樞密院掌兵官及京

城戍兵仍諭行院帥府毋擅增設簽補辛未罷行總管府及招

討統軍檢察等司定宋人來歸賞格及詐誘征防軍人逃亡罪

法閏月辛巳朔元兵徇鄜州乙酉提控木甲咬住破沈丘賊于

原瓦丙戌頒詔無論河南土寇定招捕官賞格己丑孫瑀及捕

盜官吾古出招降泰和縣賊二千詔斬其首惡餘皆釋之保靜

軍節度同知郭澍以徵糧失期誣殺平民坐誅辛卯官軍復葭

州癸巳通遠軍節度使李木魯合住削官丙申紅襖賊夜入蒙

城縣大掠而去縣官失其符印軍民死者甚衆己亥發兵捕京

東盜并撫諭百姓壬寅發上林署粟賑貧民陳亳等州鹿邑城

父諸縣盜蠶起起樞府遣官討之捕盜軍所過殘民遣御史往
按視軍所獲牛有司以官錢收贖已酉更造典定寶泉每一貫
當通寶四百貫

元光元年正月庚戌朔免朔辛亥元帥惟弼破紅襖賊于張窰
店壬午遣官墾種京東西南三路水田甲寅詔陝西西路行省
徙京兆者兵退還治平涼防州刺史把移失刺以棗城伏誅鄭
州防禦使裴滿羊哥同知古里甲石倫除名西面節度使把古
乃住奪官壬辰詔徙中京唐鄧商號許陝等州屯軍及諸軍家
屬赴京兆同華就糧二月乙酉陝西西路行省請以厚賞募河
西諸蕃部族寺僧圖復大通城命行省樞密院籌之癸巳上諭
宰臣宋人攻平輿褒信我師力戰却之事狀已詳其遣濟望官
齋空名宣勅覈實給之庶見朝廷懇於勸獎無俟帥府上功然

後推賞乙未元兵屯葭州甲辰上念邨延被兵嘗發民粟給軍
詔除延安鄜坊丹葭綏德稅租仍令有司償其粟立不足者許
補官戊申恆州軍變萬戶呼延棫等千餘人殺掠城中焚廬舍
而去己酉遣行元帥府事訛可佈制三路軍馬伐宋同簽行樞
密院時全副之三月辛酉宋人掠碓山縣之劉村戊辰樞密院
委差官賈天安上書言利害壬申御史劾徒單思忠以病馬輸
官帛取高價論監主自盜上愼惜大體降授陳州防禦使癸酉
提控李師林敗夏人于永木嶺郭文振表近得俘者言南北合
兵將攻河南陝西詔樞密備禦四月辛巳置大司農司設大司
農卿少卿丞京東西南三路陝西並置行司兼採訪公事設捕
盜方畧壬午元兵攻陵川縣丁酉削林懷路行元帥府事惟良
官兩階罷之戊戌更定辟舉縣令之法命復行之制諸監官及

八品以下職事試補侍衛親軍籍丁憂待闕追殿等官以備防
秋召致政胥鼎等赴省議利害丁未行樞密院報淮南之捷五
月戊申朔元兵屯隰吉翼等州六月戊寅朔陳州防禦使呂子
羽坐乏軍興自盡造舟運陝西糧由大慶關渡抵湖城癸未大
赦丁酉紅襖賊掠柳子鎮驅百姓及驛馬而去提控張瑀追擊
奪所掠還偽監軍王二據黎陽縣提控王泉討之復其城七月
庚戌元將按察兒屯晉安冀州之境己未歸德行樞密院王庭
玉報曹州破紅襖賊之捷庚申定監當官選法河北羣盜犯封
丘開封界令樞密院禦捕戊辰紅襖賊襲徐州之十八里砦又
襲古城桃園官軍破之乙亥太白晝見經天與日爭光八月丁
丑定西征將士官賞有差己卯彗星見西方大赦改元止論宰
臣赦書已頒時刻之間人命所係其令將命者速往刻期而至

甲申增定裁匿逃亡親軍罪及告捕賞格積石州蕃族叛附于
夏鞏州提控尼龐古三郎討之獲羊千口進尚勝詔却之壬寅
祈雨九月丙午朔諭陝西行省備邊乙卯議經畧淮南己巳宋
人掠遂平縣之石砦店復侵南陽唐州提控夾谷九住敗之十
月丁丑夏人掠德順之神林堡壬午宋張恣攻零子鎮爲幹魯
朶所敗酋其裨將二人河中府萬戶孫仲威執其安撫使阿不
罕胡魯刺據城叛陝西行省遣將討平之癸未復曹州甲申上
獵于近郊詔免百官送迎并百姓治道庚寅徙彰德招撫使杜
先軍於衛州乙未元兵下榮州之胡壁堡及臨晉十一月丁未
元兵徇同州戊辰元蒙古蒲花攻鳳翔府十二月乙亥朔上語
皇太子吾嘗夜思天下事必索燭以記明而卽行汝亦當然丁
亥疊州總管青宜可卒特命其子角襲職戊子詔復置近待局

說書官諭以奉御奉職皆少年不知書朕憶曩時日爲講諭自古君臣父子之教使知所以事上者己丑蘭州提控唐括時敗夏人于質孤堡元大軍攻鳳翔

二年正月甲辰詔免朔賀乙巳元兵下河中府壬子奪壽州防禦使完顏乃刺官四階時宰臣遇有人言便宜事屢奏乞作中旨行之上曰帝王從諫足稱聖治豈可掠美以爲己出不聽戊午李燾驢以罪罷宰臣請竊以散地上曰此輩豪傑正須誠待若以術制適使自疑但不畀軍政外補何害乃授恆州刺史時鬻爵恩例有起復丁憂官之令上謂教人以不孝亦不許二月壬午詔尚書省議軍官犯罪舊制更不任用今多故之秋人才難得除大罪外徒刑追配有武藝善掌兵者量才復用丁亥大赦己亥鳳翔圍解三月甲辰朔宋人襲汝陽辛酉禁茶壬戌

詔以鳳翔殿功及頒賞等級徧諭諸郡梓未詔職官犯罪非死
罪除名遇赦幸免有才幹者中外僉用四月癸酉朔復霍州汾
西縣詔給空名宣勅遷賞將士之有功者丙子設京兆南山安
撫司丁丑贈死節鳳翔萬戶完顏醜和懷遠大將軍其父恕除
以功例賞外遷兩官升職二等己卯遣官閱河南帥府見兵籍
簽寄居官民及閑官橐石親丁并遼東河北客戶爲軍五月癸
卯朔始造元光重寶及元光珍貨同銀行用丙午復河中府及
榮州遣人持檄招前恆山公武仙及東平嚴實己未參政毅夫
言脅從人號忠孝軍置汾淮者所爲多不法請防閑之上曰人
心惟頌以之何如若果有術遠方猶且聽命不然雖左右亦難
防閑正在廓開大度而已若是而不能致太平者命也六月乙
亥京東總帥報淮南之捷戊子議遣人招李全張林甲午詔罷

河中行省置元帥府七月壬寅朔夏人犯積石州寇界寺族多陷沒惟桑迦寺僧看通昭迦斯沒及答那寺僧奔鞠等拒而不從詔賞諸僧鈐轄正將等官給以廩祿乙巳遣兵守衛解州鹽池庚戌以空名宣勅遷賞諸部降人壬子除市易用銀及銀與寶泉私相交易之禁癸丑勅諸御史比聞朝官及承應人月給俸糧多雜糠土出納斗斛小大不一此皆理所不容而臺官初不問事事須朕言之安用汝曹也乙卯丹鳳門壞丁巳陰坡族之骨鞠門等叛歸夏夾谷瑞發兵討之以捷聞戊午宰臣方對有司奏前奉御溫敦太平卒上大駭曰朕屢欲授太平一職每以事阻憶昔海陵時有二護衛私語一曰富貴在天一曰由君所賜輒授言由君所賜者以五品職意謂誠由已也而其人以疾卒章宗將拜平章張萬公丞相亦遂不起凡此皆命也八月

壬申詔賞京兆路官軍保全南山諸谷之功各以人數多寡爲等第千人以上官一階三千人以上兩階五千人以上三階仍升職一等能以力戰護之者又增一階戰沒者就以贈之甲戌神州經畧使納合六哥叛遣官招納拒命詔牙吾塔會行院兵討之能捕獲者除見定官外仍與世襲謀克丙戌遣官分行蔡息陳臺唐鄧裕諸州凡民丁相聚立砦避兵與各巡檢軍相依者五千戶以上置砦長一員五百戶增副一員能安民弭盜勸農者諭功注授九月庚子朔宋人入壽州女奚烈蒲乃力戰却之壬寅樞密院奏提控術甲剽只罕破宋人之功甲辰宋人攻南陽官軍與戰于胡陂奮力却之提控術虎春兒爲所殺贈以銀青榮祿大夫丙午牙吾塔報桃園淮陽之捷戊申降人孫那佐自李全軍中歸遙授知東平府兼山東西路兵馬都總管癸

丑叛將六哥所署僞都統烏古論賽漢夾谷留住等來歸丙寅
扎也胡魯等拔邳州南城十月乙亥制行樞密院及元帥府農
隙之月分番巡徼校獵月不過三次丁丑上獵于近郊己卯於
于太廟辛卯詔石壕店沔池永寧縣各屯兵千人壬辰滕州人
時明謀反伏誅戊戌唐鄧行元帥報淮南之捷十一月辛丑牙
吾塔報邳州之捷函叛人六哥首以獻丙午邳州紅襖賊三千
來降朝議置諸陳許之間上恐家屬尚在河朔餘黨必殺之所
得者寡被害者衆亦何安忍命使撫諭加以官賞遣還果忠於
我雖處河朔豈應負我且餘衆感恩將有效順者矣戊午論上
黨公完顏開及文振史詠王遇張道盧芝等各與所部帥府相
視可耕土田及灑河北岸之地分界而種之以給軍餉給以空
名宣命金銀符賞功辛酉鞏州行元帥府報會州破夏人之捷

十二月己巳朔徙沿淮巡檢邊軍于內地辛巳詔延安土人充
司縣官義軍使者選人代之量免其民差稅邳州民丁死戰陣
者各贈官一階歸德徐邳宿泗永亳穎壽等州復業及新地民
免差稅二年見戶一年嘗供給邳州者復免一年之半睢州陳
留杞縣免三之一丁亥帝不豫免朝戊子皇太子率百官及王
妃公主入問起居庚寅崩于寧德殿壽六十一壬辰宣遺詔赦
中外諡曰繼天興統述道勤仁英武聖孝皇帝廟號宣宗正大
元年三月庚申葬德陵 帝當金源末運雖乏撥亂反正之材
而有勵精圖治之志迹其勤政憂民中興之業蓋可期也然而
性本猜忌崇信讐御獎用吏胥苛刻成風舉措失當懷巨惡援
立之私緩趙鞅晉陽之責既不能罪高琪而遂相之方且徃於
餘威牽制羣議南開宋蚌西啓夏侮兵力既分功不補患曾未

數年遂至再遷失國豈不重可歎哉

載記 金主之九

哀宗皇帝本名寧甲速宜宗第三子母王皇后以承安三年八月二十三日生於翼邸賜名守禮泰和中授金紫光祿大夫宣宗登極進封遂王授祕書監殿前都點檢改樞密使立爲皇太子仍控制樞密院事改賜守緒上病喉痺危篤暮夜近臣皆出惟前朝資明夫人鄭氏年老侍側帝知其可託語以速召皇太子主後事言絕而崩夫人祕之俄頃皇后及貴妃麗氏問安寢問麗素陰狡機慧常慮其子英王守純年長不得立心懷歎望恐乘機爲變卽給之曰上方更衣且少休他室伺其入遂鎖之悉召大臣迎皇太子始啓戶出后妃發喪時英王已先在內皇太子始至知之分遣樞密院及東宮親衛總領移刺蒲阿集軍

三萬屯于東華門街部署既定命護衛四人監守純於近侍局
乃於樞前卽皇帝位詔畧曰朕述先帝之遺意有便於時欲行
而未及者悉奉而行之國家已有定制有司往往以情破法使
人罔遭刑憲今後律有本條而不遵者坐以故入人罪草澤士
庶許令直言軍國利害雖涉謗讟無可采取者僉不坐罪宋自
宣宗遷汴後以本朝不足感絕不往來至是羣臣建言可因國
喪遣使報哀副以遺留物因與講解盡撤邊備共守武休之險
下省院議皆言朝廷若先遣人恐於國體有虧遂不遣

正大元年正月戊戌朔改元庚子上居廬百官始奏事以左司
政事權叅政石盞尉忻爲尚書右丞太常卿李蹊爲翰林承旨
權叅知政事甲辰賜策論進士李术論長河以下十人經義進
士張介以下五人及第戊申賜詞賦進士王鶚以下五十人及

第詔刑部登聞檢鼓院毋鎖閉防護聽有寃者陳訴六月辛卯
立妃徒單氏爲皇后遣樞密判官彩刺蒲阿幸兵至光州榜諭
宋界軍民更不南伐七月己亥詔諭百官各勤乃職癸卯補脩
大樂十月戊午夏國遣使來脩好十二月甲寅改定辟舉縣令
法課以六事左丞張行信上言先帝詔書國內刑不上大夫治
以廉恥高琪所定職官犯罪的決百餘條乞改依舊制詔畧施
行之二年正月甲申有黃黑之震四月甲午京畿旱遣使慮
囚鈞與許州大雨雹丁酉鄆州雨傷麥五月丁丑旱甚責已避
殿減膳赦罪七月都水滌察毛花輦殺人免死除名八月鞏州
元帥田瑄反母弟十哥殺之山降以爲涇州節度使世襲猛安
九月與夏國議和事金以兄國書稱弟各用本國年號遣使來
聘十月新軍政改總領爲都尉癸亥遣禮部尚書與敦良弼大

理卿裴滿欽甫侍御史烏古孫弘殺爲夏國報成使乙亥而論
臺諫宋人輕犯邊界我以輕騎襲之冀其懲創通好以息吾民
夏人從來臣屬我朝今稱帝以和我尚不以爲辱宗果行成尚
欲用兵乎卿等宜悉朕意十二月內族王家奴故殺鮮于主簿
權貴多救之者上謂國家衰弱之際生靈有幾英王朕兄尚不
敢妄撻一人朕爲人主亦不敢無罪害物族子恃勢如此吾民
何賴特命斬之是歲立褒忠廟祀死節士十有三人各塑其像
仍書子孫姓名于御屏量材官之禁宿泗青口巡邊官兵毋復
擅殺過淮紅襖軍詔趙秉文楊雲翼作龜鏡萬年錄 三年三
月陝西旱詔尚書省議裁減用度四月辛卯親享太廟鄰國夫
人車經御路過廟前不下詔繫僕婢于獄杖之辛丑旱遣官禱
于濟瀆癸卯祈于太廟禁緞扇河南大雨雹已酉遣使慮囚捕

蝗五月己未雨宋兵掠壽州境癸亥永州桃園軍失利死者四百人乙丑大雨壬申詔諭興州趙甫等能以土地來歸當任使之六月辛卯京東大雨雹蝗盡死壬子詔諭高麗及遼東行省葛不剌討反賊萬家奴赦脅從者八月辛卯詔設益政院于內延以楊雲翼等爲益政院說書官日二人直備顧問十月丁酉夏使來報哀十一月庚申議與宋脩好己巳宋忠義軍夏全自楚州來歸王義深張惠范成進相繼以城降詔封全金源惠臨淄義深東平成進膠西皆郡王辛未改楚州爲平淮府赦諸路從宋及淮楚官吏軍民并其家屬和宋議寢丙子元兵征西夏平中興府台陝西行省及總帥完顏訛可牙吾塔赴汴議兵事詔給銀二十五萬兩諭陝西兩省從其給賞凡從事三品以下官聽以功過賞罰之遺中大夫完顏履信爲弔祭夏國使 四

年正月壬戌增築中京城浚汴堤并外濠二月蒲阿牙吾塔復平陽執知府李七斤獲馬八千以銀贖鹵獲男女分賜官軍者聽自便三月元兵平德順府復下平陽己巳徵夏稅二倍五月丁丑元兵平臨洮府陝西行省進三策上策自將出戰中策幸陝州下策棄秦保潼關俱不從六月戊申朔遣前御史大夫完顏合周爲大元議和使丙辰地震太白入井賜詞賦經義盧亞以下進士及第七月元兵自鳳翔徇京兆關中大震壬辰以中丞烏古孫卜吉祭酒裴滿阿虎帶兼司農卿簽民軍勸率富民入保城聚兼督秋稅令百姓知避遷之計丁酉赦陝西東西兩路賜民今年租八月庚戌詔有司罷遣防備丁壯脩城民夫軍須差發應不急者權停己巳立帝生日爲萬年節同知集賢院史公奕進大定遺訓待制呂造進尚書要畧是日大風落左掖

門鵬尾壞丹鳳門扉隕霜禾盡損李全自益都復入楚州據之
命招以淮南王爵全言義深成進皆我部曲而受王封何以處
我竟不至壬戌上獵監察御史進諫怒以過名賣直詔責之十
一月乙未日晡有白虹二貫于上丁酉獵近郊十二月元兵下
商州壬子遣使安撫陝西以牛千頭賜貧民五年正月丁丑
親祭三廟庚辰遣知開封府事完顏麻斤出如大元弔慰丙戌
議擊盱眙二月乙巳朔大寒雷雨雪木之華者盡死三月乙酉
監察御史烏古論不魯劾近侍張文壽張仁壽李麟之受饋
遺上怒凡四日不視朝御史再言三姦不已始曲赦其罪而出
之四月辛亥議放還西夏人口丙寅親衛軍王咬兒酗酒殺其
孫大理寺當以徒刑特命斬之六月壬戌旱赦雜犯死罪已下
八月乙卯遣使禱于上清宮九月庚寅雨足始種麥十一月辛

已進宣宗實錄十二月庚子朔完顏麻斤出以奉使不職免死
除名改完顏訥申待講學士充國信使癸丑以陝西大寒賜軍
士柴炭銀有差京兆鳳翔府司竹監進竹令分給之 六年二

月丙辰耀州刺史李興有戰功詔賜玉兔帶金器五月隴州
防禦使石抹冬兒進黃鸝詔却之七月罷陝西行省軍中浮
費十月元兵駐慶陽界詔陝西行省遣使奉羊酒幣帛乞緩師
請和十一月遣使選試陝西歸順人得軍二千以藝優者充忠
孝軍次充合里合軍十二月詔蒲阿牙吾塔權簽樞密院事與
訛可救慶陽罷附京獵地聽民耕稼 七年正月慶陽圍解命
訛可屯邠州蒲阿牙吾塔還京五月詔釋清口宋敗軍三千人
願留者五百人以屯許州餘悉縱遣之賜經義詞賦李塘以下
進士出身有差七月元軍入陝西京兆同華之間破南山砦柵

六十餘所八月賜陝西死事之孤鹽引及絹仍量材任使入
年正月元兵圍鳳翔合達蒲阿瞻望逗遛遣密院判官白華右
司郎中夾谷八里門馳問目今二月過半有怠歸之形諸軍何
故不動蒲阿曰彼軍絕無糧餉正使欲戰不得欲留不能將自
做矣合達初言不可動再言見機可動則動矣還奏上知其怯
復遣傳旨鳳翔圍久恐守者力不能支爾等當領軍出關宿華
陰界略與渭北軍交手大兵聞之必當奔赴且以少紓鳳翔之
急兩省廻奏領旨華東還仰天浩歎曰事至于此無如之何四
月丁巳朔赦免京西路軍需錢一年旱災州縣差稅從實減貸
元兵入鳳翔府兩行省棄京兆遷居民於河南留慶山奴守之
五月李全妻楊妙真以全陷汜于宋構浮梁楚州北就北帥梭
魯兀乞師復讐上恐離河南不遠遣合達蒲阿屯桃源界激河

口以備侵軼因約宋將趙范趙葵爲夾攻之計宋八里莊人拒之詔改八里莊爲鎮淮府七月宋將焚浮梁九月丙申慈聖宮皇太后溫敦氏崩遣詔園陵制度務從儉約元兵駐河中府虜山奴乘京兆東還召合達蒲阿赴汴議引兵趨河中府懼不敢行還陝州出師至冷水谷而歸元兵攻河中府合達蒲阿遣元帥王致率兵萬人救之十一月丁未元兵由金州進曉峰關報至時日已暮省院官入奏北軍冒險萬里經歷二年方入武休其勞已極今但以兵屯睢鄭昌武歸德及守洛陽潼關懷孟等處京師積糧數多命河南州郡堅壁清野百姓聚保山砦彼欲攻不能欲戰不得師老食盡不擊自歸矣上太息曰南渡二十年所在之民破田宅鬻妻子以養軍士朕在東宮日立親衛騎兵武衛護衛十三都尉每尉衆至萬人彊壯趨捷極爲精練忠

孝軍萬八千皆回紇河西中州人被掠逃歸者今敵至不能迎
戰徒以自保京城雖存何以爲國天下其謂我何朕熟思之存
亡有天命惟不負民可也乃詔諸將屯軍襄鄧十二月己未河
中府破合達蒲阿率諸軍入鄧州楊沃衍完顏彝武仙皆引兵
來會出屯順陽戊辰元兵渡漢江而北丙子畢渡分道趨汴京
師戒嚴詔脩樓櫓及守禦備

天興元年正月壬午朔日有兩珥元兵道唐州元帥兩婁室與
戰襄城之汝墳敗績遁走汴京遣完顏麻斤出等部民丁萬人
決河水衛京城癸未置尚書省樞密院于宮中以便召問乙酉
以點檢夾谷撒合爲總帥將步騎三萬巡河渡權近侍局使徒
單長樂監其軍起近京諸邑軍家屬五十萬口入京丙戌元兵
由河清縣白坡渡河丁亥長樂撒合引兵至封丘而還戊子斜

卯愛實上書請斬二人以肅軍政不報壬辰衛州節度使完顏
斜捨阿不棄城走汴甲午元兵薄鄭州與白坡兵合屯軍元帥
馬伯堅以城降防禦使烏林荅咬住死之乙未元游騎至汴城
丁酉大雪兩省軍及元兵戰鈞州之三峯山大潰自是兵不復
振己亥義勝軍校侯進社正張與率所部北降庚子御端門肆
赦改元開興辛丑潼關守將李平降壬寅扶溝民錢大亨李鈞
叛殺縣令王浩及其簿尉庚戌許州軍變殺元帥古里甲石倫
等以城降二月甲寅元兵徇臨潼攝縣令張若愚死之戊午次
盧氏大雪關陝行省徒單兀典總帥納合合閏兩軍棄潼關而
東未戰軍潰咸敗而死完顏重喜降斬于馬前都尉鄭偁殺都
尉苗英亦降戮其妻子己未元兵下睢州乙丑攻歸德庚午括
京師民軍二十萬分隸諸帥三月丁亥元軍平中京甲午命平

章白撒宿上清宮樞副合喜宿大佛寺以備緩急元遣使自鄭
州來諭降使者立出國書以授譯史轉授宰相上起立受之以
付有司書索翰林學士趙秉文衍聖公孔元措等二十七家及
歸順人家屬蒲阿妻子緒女工匠鷹人又數十人庚子封荆王
子訛可爲曹王議以爲質壬寅曹王入辭宴于宮中命左丞李
蹊送之諫議大夫裴滿阿虎帶太府監國世榮爲講和使戶部
侍郎楊慥權叅知政事分軍防守四城置局養無家俘民四月
癸丑兵士李新有功擢四方館使丁巳遣戶部侍郎楊仁奉金
帛詣軍前乞和戊午又以珍異往謝許和甲子又改元天興詔
內外官民能完復州郡者遷賞有差出金帛酒炙犒飫軍士減
御膳罷冗員上書不得稱聖改聖旨爲制旨釋鑄厲王衛紹五
二族禁錮聽自便乙丑百官初起居于隆德殿前丙寅以尚書

省兼樞密院事丁卯放宮女聽以衣裝自隨金珠留犒士卒戊辰汴京解嚴步軍始出封丘門采薪蔬已已建威都尉完顏兀詢同元使沒忒入城庚午見使臣於龍德殿辛未開鄭門聽百姓男子出入遷民告出者日以萬數甲戌御承天門大饗將士聞有聲屈者亟命還宮乙亥有詔止奏事五月乙酉內族思烈行鄧州尚書省以名援兵丙戌拜天於大慶殿放京城四面軍李辛不奉詔戊子裕州鎮防軍將領賀都喜率西軍二千人入援辛卯大寒如冬汴京大疫凡五十日諸門出死者九十餘萬人貧不能葬者不在是數辛丑上御香閣面責宰相乙丑將相受保城爵賞六月庚戌朔詔百官舉大將劉益上不能用癸丑以出師銅門禁飛虎軍二百人奪封丘門出奔丙辰闕官馬殺其瘠者以食庚申塞京城四門以便守禦辛未復脩汴城以疫

後園戶僧道醫師粥棺者擅厚利命有司倍征之以助其用乙亥李蹊送曹王與其子全俱還七月庚辰朔兵刃有火辛巳軍士搥登聞鼓乞將劉蓋癸未右丞顏蓋世魯罷以完顏奴申叅知政事甲申飛虎軍事申福蔡元擅殺北使唐慶等三十餘人于館詔貰其罪和議遂絕丁亥拜天于承天門下出內府及兩宮物賜軍士戊子下令招軍命簽民爲之鞏昌民百二十赴援乙未新軍有搥登聞鼓者杖殺之乙巳金木火太陰會于軫翼丙午思烈武仙及鞏昌總帥完顏忽斜虎率諸將兵自汝州入援命李蹊勸諭石蓋合喜出兵一萬八月己酉朔屯杏花營又益以五千兵始進屯中牟故城辛亥斜虎思烈遇元兵于京水大潰中京元帥左監軍任守貞死之合喜棄輜重奔至鄭門聚兵乃入甲寅免爲庶人因籍其家以賜軍士降監軍長樂爲符

寶郎戊午括民間粟己未籍徒單兀典完顏重喜納合合問家
貲戊辰復起侯摯行京都路尚書省事乙亥賫官及許買進士
第授入貲京城民楊興廷州刺史劉仲溫許州刺史九月戊寅
朔詔減親衛軍己丑軍士殺鄭門守者庚辰復起張開王義深
范成進爲元帥完顏合周權叅知政事乙未召民賣放下年軍
需錢上戶田租如之辛丑夜大雷工部尚書范乃速震死問月
辛亥遣張開溫撤辛劉益高顯率步軍護陳留通許糧道戊午
招民爲鄉導己未連有書姦臣姓名者以箭射入宮得之辛酉
再括京城粟以御史大夫合周點檢徒單百家等主之十月前
司農卿李煥飛語詔繫李蹊并戶部侍郎楊慥于獄以失軍儲
坐罪除名慥家貲被籍送以換權戶部尚書尋赦殘欠糧其應
以糧事繫者皆釋之乙未詔徵諸道兵期以十二月一日入援

十一月丁未朔賜貧民粥已酉衛州軍校白晝取豐備倉米壬子京城人相食癸丑詔曹門朱門放士民出就食壬戌召諸將相入議事丙寅河解元帥權典寶軍節度使趙信襲據陝州以叛殺行省阿不罕奴十刺以下凡二十一人誣以爲反上知其寃不能直就授偉元帥左監軍兼西安軍節度使行總帥府事尋亦歸北十二月丙子朔以事勢危急甲申詔議親出以賽不白撒訛出李蹊徒單百家等率諸軍扈從完顏奴申習捏阿不裏城四面都總領戶部尚書完顏珠顙外城東而元帥把撒合南而元帥木甲咬住西面元帥孛術魯買奴北面元帥學士承旨烏古孫卜吉提控諸王府同判大睦親府事內族合周管宮掖事行省左右司郎中烏古孫奴申兼知宮省事御史大夫裴滿阿虎帶兼鎮撫軍民京城都彈壓除拜旣定以京城付之擢

前儀封令魏璠爲翰林脩撰如鄧州招武仙入援丁亥上御端
門發府庫及兩府器皿宮人衣服賜將士庚子帝服絳紗袍尊
從如常儀與太后皇后諸妃大慟而別行次公主苑太后遣中
宮持米肉徧犒軍士辛丑至開陽門外麾留守官及京城父老
退詔諭戍兵曰社稷宗廟在此汝等壯士毋以不預進發之數
便謂無功若保守無虞將來功賞顧豈在戰士下聞者皆灑泣
是日鞏昌元帥完顏忽斜虎至自金昌爲上言京西三百里之
間無井竈不可往東行之議遂決以爲尚書右丞從行遂次陳
留壬寅次杞縣癸卯次黃城甲辰次黃陵岡乙巳諸將復請幸
河朔從之 二年正月丙午朔濟河北風大作後軍不克濟丁
未元將回古乃追擊于南岸元帥完顏猪兒賀都喜紇石烈訛
諭等死之溺死者近千人建威都尉完顏兀論山降于元帝於

北岸望之震懼丁酉上率從官爲猪兒等設祭哭之皆贈以官
錄用其子姪斬兀論出二弟以殉赦河朔招集兵糧議取衛州
元帥蒲察官奴將忠孝軍千人東面元帥高顯果毅都尉粘哥
咬住領軍萬人爲前鋒庚戌上次漚麻岡元帥和速嘉兀底不
繼至辛亥白撒引兵攻衛州不克乙卯聞河南大兵濟自張家
渡至衛之西南詔班師戊午車駕次蒲城復還魏己未帝夜棄
六軍渡河與副元帥合里合六七人走歸德侍衛皆不知巡警
如故庚申諸軍知帝已往遂潰辛酉夜四鼓帝狼狽由西門入
城赦府囚軍民普覃一官賜進士終場王輔以下十六人出身
戊辰崔立舉兵爲亂殺參知政事完顏奴中樞密副使完顏斜
捺阿不勒兵入見太后集百官議監國言衛紹王太子梁王承
恪其妹公主在北兵中可立之乃遣其黨御史中丞韓鐸以太

后命往召承恪既入宣詣受百官拜舞山呼以天子袞冕后服
上進遣送二相所佩虎符請元將速不斛納欵凡除拜皆以監
國爲辭署工部尚書溫迪罕二十吏部侍郎劉仲周僉爲叅知
政事宜徵使與屯彝卿爲左丞戶部侍郎張正倫爲右丞都事
張節師肅爲左右司郎中省椽元好問員外郎都轉運知事王
天祺懷州同知康璿僉爲左右司都事開封判官李禹翼乘官
去戶部主事鄭著名不起左副點檢完顏阿散右副點檢溫敦
阿里皆死癸酉元將速不斛進兵汴京乙亥遣右宜徵提點近
侍局事移刺粘古如徐州相地形察倉庫虛實二月丙子朔括
城中榷知歸德府石盡女魯懼乞盡散衛兵出城就食蔡帥烏
古論鎬表請臨幸上遣直學士烏古論蒲鮮以幸蔡之意諭其
州人戊辰蒲察官奴以忠孝軍爲亂攻殺馬用女魯懼點檢徒

單長樂從官左丞李蹊已下三百餘人軍將禁衛民庶死者三千奉帝居照碧堂禁諸臣無敢奏對者帝日悲泣曰自古無不亡之國不死之主但恨朕不知用人致爲此奴所困耳時從官久苦饑窘帝聞蔡州城地堅固兵衆糧廣懇欲幸之官奴力爭以爲不可憤怒而出號於衆曰敢言南遷者斬四月癸巳崔立以梁王從恪荆王守純及諸宗室男女五百餘人至青城甲午兩宮北遷六月己卯官奴及其黨阿里合白進皆伏誅上御雙門赦忠孝軍以范陳偁王山兒爲元帥統領之遂次策遷蔡詔蔡息陳穎各以兵來迎壬午中京破辛卯上發歸德留元帥王楙守之壬辰久亳州上黃衣皂笠金兔鶻帶前導青黃二旗黃撤帷後從者二三百人馬五十餘匹而已又南六十里避雨雙溝寺中帝見蒿艾滿目無一人跡喟然嘆曰生靈盡矣爲之一

勸學已上義深據靈壁望口寨以叛遣近侍直長女奚烈完出將徐宿兵討之義深敗走漣水入宋已亥上入蔡州城中僧道父老千人拜伏道左見帝儀衛蕭條莫不感泣帝亦歔歔者久之遣近侍諭以國家涵養汝輩百有餘年今朕無德令爾塗炭汝輩無忘祖宗之德皆泣下呼萬歲辛丑詔徐州行省抹撻兀典赴蔡州以權叅政簽樞密院事七月癸卯朔敕蔡州管內雜犯死罪以下官吏軍民普單兩官經應辦者更遷一官弛門禁員衆貨蔡人便之乙巳完顏藥師爲鎮南軍節度使兼蔡州管內觀察使戊申左右司郎中烏古論蒲鮮兼息州刺史權元帥右都監權總帥婁室同簽樞密院事丁巳護衛蒲鮮石魯負祖宗御容至自汴勅有司奉安于乾元寺丁卯定進馬還賞格每甲馬一匹或二匹以上還賞有差自是西山帥臣范真姬汝

作等各以馬進凡得千餘匹以抹撚兀典領之又遣使分詣諸道選兵赴蔡得精銳萬人命工部侍郎木甲咬住監繕器甲踏月告成軍威稍振八月癸酉朔以秦州元帥粘哥完展權陝西行省叅知政事諭以蠟書期九月中徵兵與上會于饒豐關欲出宋不意以取興元甲戌青山招撫盧進奏元使王楫諭宋還宋以軍護其行帝爲之懼丁丑閱兵于見山亭癸未元帥楚珌復立歸州於蒙城詔遷賞有差州縣官皆令真授乙酉元召宋兵攻唐州破其城宋駐兵息州南丙戌詔抹撚兀典妻室行省院于息州以兵襲宋人于中渡店斬獲甚衆庚寅初設四隅機察官乙未萬年節州郡二十餘所以表來賀辛丑設和糴及惠民司官以年老進士二人爲之太醫數人更直給病人藥九月癸卯朔假致仕內族阿虎帶同僉大睦親府事使宋借糧入辭

帝諭以宋人負朕實深朕自卽位以來戒飭邊將無犯南界凡
遇有請征討者未嘗不切責之向得宋一州隨卽付與近淮陰
來歸多以金幣爲贖朕不肯受財貨取付之全城秋毫不計清
口臨陣生獲人數千悉遣以資糴今乘我做據壽入唐攻鄧朕
諒爲謀亦淺大元滅國四十以及西夏夏亡及於我我亡必及
於宋唇亡齒寒自然之理若與我連和正所以自爲也旣至論
宋不許時諸帥往往擁兵自固戊申魯山帥元志冒險數百里
率兵入援且戰且行比至衆千餘幾喪其半上表異之賜以大
信牌升爲總帥庚戌重九拜天子節度使屢羣臣陪從成禮上
面諭國家自開創涵養汝等百有餘年且先世立功已身被堅
執銳積亦有年今當厄運與朕同患可謂忠矣比聞北兵將至
正汝等立功報國之秋縱死王事不失爲忠孝之鬼死往者立

功常患不知今朕親臨其可不勉因各賜卮酒餘未竟遽騎馳
奏敵兵突至將士踴躍請戰分軍防守以總帥李木魯堪室守
城東面內族承麟副之烏古論鎬守南面元志副之兀林荅胡
土守西面忠孝軍元帥蔡八兒副之權殿前右點檢王山兒守
北面元帥紇石烈拍壽副之西安軍節度兼殿前右衛將軍行
元帥府事女奚烈完出守東南元帥左都監夾谷當哥副之殿
前右衛將軍權左副都點檢內族斜烈守于城都尉王愛實副
之辛亥元兵築長壘圍蔡城已未括城中粟禁公私釀酒十月
戊辰更造天典寶會辛巳縱饑民老稚羸疾者出城甲申給饑
民船聽採城壕菱芡草以食戊子徵諸道兵辛卯水上闊射于
子城并義軍戰歿被創者皆賞以麥有差十一月辛丑朔以左
副都點檢阿勒根移失刺爲宣差鎮撫都彈壓別設彈壓四員

副之四隅機察亦隸焉宋遣其將江海孟珙帥兵萬人獻糧三十萬石助元兵攻蔡十二月甲戌上親山撫軍盡籍民丁防守括婦人壯捷者假男子衣帽運大石丁丑元兵決練江宋兵決柴潭入汝水己卯元兵破外城宿州副總帥高剌哥戰歿己丑元兵陷西城帝語侍臣我爲金紫十月太子十年人主十年自知無大過惡死無所恨特恨祖宗傳祚百年至我而絕與自古荒淫暴亂之君等爲亡國因此介介於愧自來亡國之君往往爲人囚繫或爲俘獻或辱於階庭閉之空谷朕志已決必不至此是日王愛實戰歿砲軍總帥王銳殺夾谷當哥率三十人降元庚寅以御用器皿賞戰士甲午帝微服車兵夜出東城謀遁及柵不果而還乙未殺尙廐馬五十疋官馬一百五十疋犒將士三年正月壬寅開柴潭神爲護國靈應王甲辰以近侍分

守四城戊申夜帝集百官傳位于元帥承麟因其固讓諭朕所以付卿者豈得已哉以肌體肥重不便鞍馬駝突卿平日趨捷有將畧萬一得免金祚不絕此朕志也已西承麟卽皇帝位百官稱賀禮畢亟出捍敵而南面已立宋帳守者棄門俄頃四面呼聲震天地大軍入城巷戰城中軍不能禦帝自縊于幽蘭軒末帝承麟退保子城聞帝崩率羣臣入臨諡曰哀宗哭奠未畢城潰諸禁近舉火焚之承麟爲亂兵所害金亡 舊史贊曰金之初興天下莫禦焉太祖太宗威制中原以効遼初故事立楚王齊委而去之宋人不競遂失故物熙宗海陵濟以虐政中原缺望大事幾去天厭南北之兵挺生世宗以仁易暴休息斯民金之延祚百有餘年由大定之政有以締結人心故也章宗志存潤色而秕政日多誅求無藝民力浸竭明昌承安盛極衰始

至於衛紹紀綱大壞亡徵已見宣宗南渡乘厥本根外征餘威
連兵宋夏內致困憊自速土崩哀宗之世無足爲者區區生聚
圖存於亡力盡乃斃可哀也矣在禮國君死社稷今始見焉

弘簡錄卷二百二十

載記 金后妃一

昭祖后徒單氏 景祖后唐括氏 世祖后挾懶氏

肅宗后蒲察氏 肅穆康 二后 太祖后 唐括氏 裴滿氏 紇石烈氏 僕散氏

妃 烏古論氏 肅氏 太宗后唐括氏 熙宗后裴滿氏

海陵嫡母徒單氏 生母 大氏 后徒單氏 諸嬖附

世宗嫡母蒲察氏 生母 李氏 后烏林答氏 元妃李氏

章宗母徒單氏 次室 劉氏 后蒲察氏 李氏 師兒

宣宗后王氏 王元妃 哀宗后徒單氏 寶符李氏

昭祖威順皇后徒單氏 渾水敵魯鄉徒單部人 諱烏古論都葛

活刺父拔炭都魯海生女性剛毅人莫敢求爲室獻祖以昭祖
勇斷異常柔弱之女不可以配乃爲娶焉生二子長烏古迺次
烏古出次室達胡末烏薩札部人生跋黑僕里黑斡里安次室
高麗人生胡失答

景祖昭肅皇后唐括氏帥水隈鴉村唐括部人諱多保真父石
世德撒骨只巫者也生女有識度能置酒饌待賓客享鄰里迨
于行旅會景祖亦能飲食過人特爲娶焉遣使同斡來伐五國
滿聶部景祖使后與劾孫爲質於拔乙門而與同斡襲取之遼
主拜景祖爲節度使日與賓客會飲后內主供饋外竊聽之翊
日枚數其所爲無一忽忘有醉而喧呶者輒自歌以釋其忿
軍中有被笞罰者每以酒食慰諭之遇景祖行部輒與偕政事
獄訟皆叅決焉沒後世祖兄弟用兵皆稟命而行勝負咸有懲

勸農月親課耕耘刈穫勉其勤於事者而訓厲晏出蚤休者後
往邑屯村遇桓被兄弟與世祖肅宗有隙舉刃相向后起兩執
其手語之曰汝等皆故夫舊人奈何一旦遽與小兒子忿爭乎
因自歌解二人怒其後桓被兄弟起兵來攻肅宗失利部人失
束寬逃歸告后曰軍敗矣后方憂懣會康宗來報世祖已退烏
春兵與桓被戰于北隘旬后乃喜生平不妒忌濶略女工能鞞
睦宗族當時以爲有丈夫之度生九子次室注思灰生劾真保
又次溫廸痕氏名敵本生麻頗阿离合滿設都訶

世祖簡翼皇后拏懶氏生康宗次太祖次魏王幹帶次太宗次
遼王斜也次室徒單氏生衛王幹賽魯王幹者次室僕散氏生
漢王烏故乃次室木虎氏生魯王闍母沂王查剌次室烏古論
氏生耶王昂簡翼以大安元年卒

肅宗靖宜皇后蒲察氏太祖將舉兵伐遼入告于后后曰汝邦家之長見可則行吾老矣無貽我憂太祖感泣奉觴爲壽卽奉后出門酌酒禱天后命太祖正坐號令諸將以後每出師還輒率諸將上謁獻所俘獲 穆宗貞惠皇后烏論古氏 康宗敬僖皇后唐括氏生楚王宗雄次室溫都氏生昭武大將軍同劄 苗次室僕散氏坐事早死生龍虎大將軍隈可 以上諸后俱天會十五年追諡自太祖正大位凡后皆不娶庶族必於甥舅之家諸妃亦無位號。

太祖嫡后唐括氏生景宣帝宗峻豐王烏烈趙王宗傑天會十三年追諡聖穆皇后仍贈父留迷太尉榮國公祖迭胡本司徒英國公曾祖劼廼司空溫國公 次室裴滿氏生遼王宗幹同年追諡光懿皇后 又次紇石烈氏生宋王宗望陳王宗雋瀋

王訛魯天會十三年尊爲太皇太后宮號慶元十四年正旦熙
宗朝于慶元宮然後御乾元殿受羣臣賀是月崩耐葬睿陵諡
曰欽憲熙宗以有保佑功與聖穆三后並耐太祖廟室 又次
僕散氏生睿宗宗輔及陶王訛魯朶天會十三年追冊德妃大
定元年追諡宣獻皇后併耐太廟 元妃烏古論氏生梁王宗
弼衛王宗強蜀王宗敏 崇妃蕭氏王紀生習泥烈息王寧吉
莒王燕孫熙宗時封爲貴妃天德二年正月進元妃是月又進
太妃海陵母大氏事之甚謹每有宴集太妃上坐大氏執婦禮
海陵積不能平誣以隱惡殺之併殺少子任王隈喝大定十九
年詔改葬命大宗正丞宗安監護葬事遣使致祭上欲復太妃
舊號從禮官議非以子貴不得稱太止當追復妃號乃封崇妃

娘子獨奴可生邪王幹忽

太宗后唐括氏熙宗雖殺宗磐猶畏物論矯情加以存恤與欽
憲俱尊爲太皇太后號明德宮贈后父阿魯朶太尉宋國公祖
實匹司徒英國公曾祖阿魯朶司空溫國公自欽憲崩後每歲
且節朔上朝明德宮然後御乾元殿受賀歲以爲常皇統元年
上自燕京還朝謁于明德宮明年上如天開殿皇子生使者馳
報太后至天開殿上與皇后親迎之二年崩諡曰欽仁皇后祔
葬恭陵四月上奉祭伏哭盡哀

熙宗后裴滿氏婆盧木部人父達本名忽撻爲人淳直孝友天
輔六年從蒲家奴追叛寇於鐵呂川力戰有功天眷元年授世
襲猛安后初封貴妃立爲皇后拜忽撻太尉封徐國公奉朝請
贈曾祖斜也司空祖鶴沙司徒皇統元年羣臣上尊號冊爲慈
明恭孝順德皇后除忽撻會寧牧二年太子濟安生熙宗喜甚

大赦告天地宗廟。冊爲皇太子。封后父爲王。賜人口馬牛羊橐駝。隨朝職官並遷一資。以後漸次干預政事。頗掣制帝。無所忌憚。朝官依之者。往往得至顯貴。宰相奔走其門。因見帝臨御數年。繼嗣不立。左丞相亮方有寵。聞其生日。后附賜禮物。帝聞之。從此積怒。遂殺后。海陵弑帝。欲收人心。以要衆。魯恭揚。熙宗過惡。言其死無罪。追諡爲悼皇后。仍封忽撻爲王。天德三年。薨。子忽覲爲燕京留守。以罪免。居中都。海陵命馳驛計之。及葬。使秘書監納合椿年致祭。賻銀五百兩。復起忽覲爲鄭州防禦使。改安國軍節度使。大定間。復熙宗帝號。加諡后爲悼平皇后。附葬思陵。賢妃生魏王道濟。皇統三年。命爲中京留守。以直學士阿懶爲都點檢。張玄素爲同點檢。左右輔導之母。初居外。至是養之。宮中未幾。熙宗怒。亦殺之。

海陵嫡母徒單氏德宗正室無子次室李氏生鄭王充養以爲子又次大氏生三子長卽海陵徒單氏賢遇下有恩大氏事之甚謹相得歡甚怒充嗜酒常切責之反愛海陵海陵自以母與徒單嫡妾分懸心常不安及聞弑僖宗與太祖妃蕭氏相顧愕然曰帝雖失道人臣可至此徒單入宮見海陵不爲慶賀海陵銜之未幾徒單與大氏俱尊爲皇太后贈后父蒲帶與大氏父俱贈太尉封王值海陵生日飲燕大氏起爲壽徒單方與諸宗婦公主語因恐久之海陵怒而出明日召諸人與徒單語者皆杖之大氏勸謂不可答以今日豈可尚如前時自是嫌隙愈深海陵旣遷中都獨留徒單於上京心常憂懼每中使至必易衣以俛命大氏在中都常思念太后每生日必遣秘書監納合椿年上壽及大氏病篤謂海陵曰徒單太后待吾母子甚厚慎毋

相忘。汝以我故，不令兩宮偕來中都。我死，必迎致事之。當如事我。會遣右丞相僕散師恭宗正丞胡拔魯往上京奉遷山陵。因命迎太后俱來。繼使平章蕭玉往廣寧迎祭梓宮。海陵謂玉曰：「醫巫閭山多佳致，祭奠禮畢，可奏太后於山水佳處遊覽。」及至流沙河，駕親迎謁梓宮。遂謁見太后，至卽命左右約杖二束，自隨跪於太后前，請曰：「亮不孝，久闕溫清，願太后痛笞之。」后下親杖之。起比杖者，使去曰：「今庶民有克家子，立百金之產，尚且愛之。有子如此，寧忍笞乎？」既至帥百官郊迎，入居壽康宮。是日上及後宮宰臣以下奉觴上壽，極歡而罷。在宮中外極恭順，太后坐起自扶掖之，常從輿輦，徒行所進御物，或自執之。見者嘉上至孝，后亦信爲誠然。以諫伐宋，海陵不喜，每謁后還，必忿怒人不知其所以。遷汴居于寧德宮，后使侍婢高福娘問起居，卽勒

事之反令伺太后動靜福娘大特未哥教以增飾語言及樞密
僕散師恭往征契丹辭謁太后與語久之因言國家世居上京
既徙中都仍復至汴今又興兵伐宋遠涉江淮疲弊中國我嘗
諫止不聽復事契丹如此奈何福娘以告海陵因念昔嘗以克
爲子今克四子已皆長成恐師恭將兵在外太后或有異圖乃
語點檢大懷忠翰林待制幹論尚衣局使虎特末武庫直長習
失使殺太后命護衛高福辭勅蒲速幹從以兵士四十戒之曰
汝等見日但言有詔令太后跪受卽擊殺之勿令艱苦懷忠等
如其言什而復起者再福等乃縊殺之年五十三焚于宮中棄
于水次并殺同乳妹安特及郡君白散阿魯瓦又察乳母南撒
侍女阿斯幹里保寧德官護衛溫廸罕查刺直長王家奴撒八
小底忽沙等又殺克子檀奴阿里白元奴耶補兒逃匿歸于世

宗自軍中名師恭還殺之及殺阿斯子孫數八二子忽沙二子封高福娘爲郎國夫人許征南回以爲妃賜銀二千兩以特未哥爲澤州刺史勅戒無酣酒毆福娘毆必殺汝其嬖幸若此大定間諡曰哀皇后特未哥與福娘皆伏誅先是海陵旣得志大氏歡甚平日春秋高飲酒不過數杯至是沉醉上使中使夾見太后飲醉甚爲可樂贈曾祖堅嗣司空祖臣寶司徒父吳天太尉國公又進爲王兄典國奴開府儀同三司衛國公及有疾編求方藥賜錢至十萬貫不得效崩日詔尚書省應隨朝官自四月十九日爲始至五月一日方治事凡禁樂一月外路自詔書已到後官司三日不治事禁樂一月登鐘七晝夜貞元三年大祥將遷山陵梓宮猶在敢所車後宮親食哭之親行冊禮諡曰慈憲皇后九月與德宗合葬于大房山升祔太廟後與徒單后

皆削去諡號徒單爲遼王妃大氏與順妃李氏寧妃蕭氏文妃
徒單氏並降爲遼王夫人

海陵后徒單氏父恭外戚有傳后初封岐國妃天德二年改封
惠妃九月立爲皇后生太子光英三年十一月二十一日后生
日百餘稱賀於武德殿后因太子生居深宮之中不知民間稼
穡之務乃繪農夫織婦艱苦之狀爲圖以賜遇上生日太子轉
以爲獻帝大異之與侍臣締觀亟稱其賢命藏以絳囊久之後
官寢多后悅頗衰希得進見光英保母張氏嘗爲海陵所幸耶
律微在北京與海陵游從令其妻侯氏入宮侍后亦幸之微本
名神涅負官錢二千六百餘萬皆得除免及幸南京備法駕乘
玉輅與后共載而入伐宋留后居守被弑後后徙中都居于大
氏故宮頃之世宗憐其無依詔歸上京父母家歲賜錢二千貫

奴婢皆給官廩大定十年卒時帝寔欲無厭後宮諸妃十二位
又有昭儀至克媛九位婕妤美人才人三位殿直最下其他不
可舉數自皇后而下第二娘子大氏封貴妃進惠妃第三娘子
蕭氏初封昭容後進淑妃耶律氏初封修容進昭媛昭儀貞元
元年又進大氏妹妃正隆二年至元妃蕭氏貞元二年進封宸
妃耶律氏貞元三年進封麗妃此猶在卽位之初尚有尊卑之
序等威之辨以後侈心益萌淫肆蠱惑從姊妹幹離不女壽寧
縣主什古喪夫寡居兀朮女靜樂縣主蒲刺及習撚宗傳女師
姑兒再從姊妹宗木女混同郡君莎里古真與妹餘都母黨表
兄張定安妻奈刺忽麗妃耶律氏妹蒲魯胡只威使高師姑內
哥阿古等傳違言語與之私通進封蒲刺壽康公主什古昭寧
公主莎里古真壽陽縣主分屬諸妃位下奈刺忽屬元妃位蒲

魯胡只屬麗妃位沙里古真餘都屬貴妃位什古重飾屬昭妃
位蒲刺師姑兒屬淑妃位每當赴召先於暖位小殿置琴阮其
中時什古已色衰常譏訕之以爲笑樂餘都貌亦不揚肌膚潔
白可愛惟習撚莎里古真最寵恃勢笞決其夫習撚夫稍喝押
護衛直宿古真夫撒速近侍局直宿海陵輒謂之曰爾妻年少
遇直宿不可令宿於家常令在妃位下每召入必親伺候廊下
立久則坐於高師姑膝上戲以汝爲天子何勞苦如此答曰我
固以天子易得此等期會真難得乃爲可貴其臥內嘗遍設地
衣各相保逐爲戲又聞古真等在外亦恣淫泆大怒罵曰爾愛
貴官有貴如天子者乎爾愛人才有才兼文武似我者乎爾愛
娛樂有豐富偉岸過於我者乎少頃氣咽不能言復撫慰之曰
無謂我聞知便爾慚慙遇燕會當行立自如無爲衆所測度恐

致非笑其無所忌耻如此又凡宮人在外有夫者皆分番出入
欲率意幸之盡遣其夫往上京婦人皆不聽出外常令教坊番
直禁中每行幸必使奏樂撤其幃帳故使人見及說淫穢語於
其前遇室女不得遂使元妃以手左右之凡妃嬪列坐皆褫褻
衣率意開敞共觀傍令人效其形狀一宮皆以爲笑仍禁給從
男子不得舉首達者刺其目女使闕懶有夫在外封以縣君欲
幸之惡其有娠飲以麝香水躬自揉拉其腹竟墮其胎蒲察阿
虎迷女又察乃妙慶宜公主所生嫁秉德之弟特里秉德誅當
連坐太后使梧桐請而得免白欲納之太后曰是兒始生先帝
親抱至家養之至于成人帝雖舅猶父也不可其後嫁宗室安
達海之子乙刺補因數使人諷納之有完顏守誠者本名遏里
來與又察素通事覺殺之太后爲又察求哀得釋復爲家奴告

以守誠死誓上語涉不道遂自臨問殺之 阿里虎姓蒲察氏
駙馬沒里野女初嫁宗盤子阿虎迭被誅再嫁宗室南家又死
時南家父突葛速爲元帥都監與海陵皆從兀朮南京欲取之
突葛速不從遂止及篡位方三日詔遣阿里虎歸父母家閱兩
月納之特封賢妃進昭妃以素嗜酒爲海陵責讓不聽由是寵
衰因與前夫阿虎迭所生女鄰國夫人重節淫亂進封蓬萊縣
主阿里虎怒重節批其頰頗有詆訾之言海陵聞之愈不悅誣
以衣遺前夫之子將殺之徒單后率諸妃嬪求哀得免有侍女
勝哥例以諸妃皆克假廝兒服男子衣冠嘗與臥起厨婢三娘
以告海陵不以爲疑惟戒勿箝筆三娘阿里虎撈殺之以是月
光英生忌不行戮自知不免卽不食日焚香禱祝逾月已頽斃
不知所爲因使人縊殺之併殺侍婢擊三娘者 彌勤姓耶律

氏乃蕭拱妻擇特懶之妹天德二年命拱取之干汴過燕京拱
父仲恭見其身形非若處女嘆曰上必致疑殺拱矣及入宮果
非處女明日遣出遂致蕭拱于死卽以擇特懶賜宗望子文爲
妻彌勒出宮數月復召入命爲充媛後封柔妃其母張氏亦封
莘國夫人伯母蘭陵郡君蕭氏爲鞏國夫人旣而詭以彌勒召
擇特懶入宮亦亂之阿懶本皇叔曹國王宗敏妻海陵殺而
納之封爲昭妃大臣奏宗敏屬近尊行不可乃令出宮又乘德
弟弘里妻高氏海陵殺諸宗室釋其婦女與宗本子莎魯判妻
宗固子胡里刺妻并胡失來妻皆欲納之宮中諷宰相蕭裕奏
請行之裕曰近殺宗室中外議論紛紜奈何復爲此耶海陵曰
吾固知裕不肯從乃使徒單貞自以已意諷裕曰朕嗣續未廣
此黨人婦女有朕中外親納之何如裕言必不肯已惟上自擇

貞謂裕上意已有所屬公固止之將成疾矣裕不得已乃具奏
遂納之封高氏爲修儀加其父高耶魯瓦輔國上將軍封母完
顏氏密國夫人先是惡悼后干政自卽位來不使母后得預政
事適高氏以家事列訴遂遣還父母家詔自今凡后妃有請干
宰相者收其使以聞 察八者亦姓耶律嘗許嫁奚人蕭堂古
帶海陵納之封爲昭媛堂古帶爲護衛察八使侍女習撚以軟
金鶴鶉袋數枚遺之事覺召問之以實對詔釋其罪海陵登寶
昌門樓以察八徇諸后妃手刃擊之墮門下死因并誅習撚
世宗嫡母蒲察氏睿宗元配父按補母卽太祖之妹初封潞王
妃皇統六年進號冀國王妃正隆例親王止封一字封許王妃
世宗卽位睿宗升祔追諡欽慈皇后贈曾祖養補司空韓國公
祖蒲刺司徒鄭國公父按補太尉曹國公大定二年祔葬景陵

生母李氏遼陽人父雜訛只仕遼至桂州觀察使天輔間遷東京士族女子有姿德者赴上京入府宗邸生世宗自幼教以義方嘗密語所親吾兒有奇相貴不可言居上京內治謹嚴臧獲皆守規矩衣服飲食器皿無不精潔致睦親族周給貧乏宗室中甚敬愛之性復明敏剛正有決容貌端整言不妄發恐仍舊俗窳劣宗族接續之乃祝髮爲比丘尼號通慧圓明大師賜紫衣歸遼陽營建清安禪寺別爲尼院居之正隆六年五月卒世宗卽位尊謚爲貞懿皇后臨終謂世宗曰卿士之念人情所同吾已用浮屠法置塔于此不必合葬也我死毋忘此言世宗深念遺命乃卽東京清安寺建神御名報德殿詔有司增大舊塔仍起奉慈殿於塔前名孝寧宮勅禮部尚書王兢爲塔銘以叙其意贈后曾祖參君司空潞國公父太尉隋國公封后妹爲邢

因夫人賜銀千兩錦綺二十端絹五百疋及翰林學士張景仁作清安寺碑文不稱旨詔左丞石琚共修之世宗至東京幸其

寺

世宗后烏林荅氏其先居海羅伊河世爲烏林荅部長率部族來歸居上京與本朝爲婚姻家曾祖勝管康宗時累使高麗父石土黑騎射絕倫從太祖伐遼領行軍猛安雖在行伍間不嗜殺人以功授世襲謀克爲東京留守后聰敏孝慈容儀整肅在父母家宗族皆敬重之既歸世宗事舅姑孝謹治家有叙甚得婦道性不妒忌所生惟太子一人爲擇後房以廣繼嗣睿宗伐宋得白玉帶乃帝王服御沒後寶畜之后言此非王邸所宜有當獻之天子世宗從之熙宗悼后果大喜雖以晚年酗酒獨得無間後海陵將謀篡立深忌宗室后又勅多獻奇寶故遼骨脂

犀佩刀吐鵝良玉茶器之類以悅其心海陵以爲恭順畏已忌刻之心頗解嘗因有疾世宗爲視醫藥數日不離去辭曰大王視妾過厚其知者以爲視疾不知者必有專妒之嫌婦道以正家爲大第恐德薄無補內治安能効嬪妾所爲惟欲已厚也及從任濟南遭上淫誦盛行亦來召之后念若便身亡海陵必殺世宗惟奉詔去此而死庶幾可免而辭世宗我當自勉不可累大王召王府臣僕張謹言論之曰汝乃王腹心人爲我禱諸東嶽我不負王使皇天后土明監我心又召家人語以我自初年爲婦以至今日未嘗見王有違道之事矧汝等皆先國王時舊人當念舊恩無效今諸宗奴僕往往傲恨以誣罔其主違此言者我死後於冥中觀之衆皆泣下從行離濟南知后立意必不肯受汗辱防護甚謹既至良鄉去中都纔七十里防之稍緩后

得聞自殺海陵雖疑世宗教之使然無問可隙改爲西京留守
過良鄉使魯國公主葬之宛平縣土魯原大定二年追冊爲昭
德皇后立別廟贈曾祖司空徐國公祖木思黑司徒代國公父
太尉瀋國公三公夫人皆完顏氏各從其國封勅有司改葬命
皇太子致奠語以朕四五歲時與皇后定婚乃祖太尉置朕于
膝上曰吾塔七人惟此最幼後來必大吾門今卜葬有期疇昔
之言驗矣六年利涉軍節度副使烏林荅鈔兀捕逃軍受賊當
死有司奏鈔兀后大功親當議詔論如法八年七月章宗生世
宗喜甚語皇太子曰得社稷冢嗣朕樂何極此皇后貽爾以陰
德也十年十月后父將改葬有司奏禮儀援唐葬太尉李良器
司徒馬燧故事百官便服送至都門外五里上曰前改葬太后
父母未嘗用此但以本朝禮改葬之惟親戚皆送皇太子臨奠

十一年皇太子生日世宗宴東宮酒酣命后女豫國公主起舞上流涕曰先皇后婦道至矣朕所以不立中宮者正念后德今無其比故也十二年四月復命立廟于太廟東北隅五月車駕幸土魯原致奠十九年改卜于大房山十一月甲寅皇后梓宮至近郊百官奉迎乙卯車駕如楊村致祭丙辰上登車送哭之慟戊午奉安于磐寧宮庚申葬于坤厚陵諸妃祔焉二十九年祔葬典陵章宗時有司奏太祖諡有昭德字改諡明德皇后

元妃李氏父石外戚有傳生鄒王允蹈衛紹王允濟潞王允德昭儀梁氏生豫王允成母早卒命同養爲子大定元年封賢妃二年進貴妃七年加封元妃時既不立后特尊元妃下皇后一等在諸妃上雖貴不得預政故宮壺無事二十一年二月從上幸長春宮戊子以疾薨詔允成允蹈允濟允德皆服衰經已丑

皇太子及扈從臣僚奉慰于芳明殿辛卯留守平章唐括安禮并曹王允功等上表奉慰中丞張九思提控殞事少府監左光慶大興少尹王修典領鹵簿儀仗宮籍監別治殞所乙未還京入自崇智門百官郊迎親戚迎奠道路殯于興德宮西位別室庚子上至京親臨致奠比葬凡三詔平章烏古論元忠監護葬事癸未啓塋上輟朝皇太子親王宗戚百官皆送甲申塋於海王莊丙戌上如莊燒飯二十八年九月與賢妃石抹氏德妃徒單氏柔妃大氏俱陪葬于坤厚陵衛紹王卽位追諡光獻皇后祔主太廟畫像衍聖宮貞祐三年九月皆削出之

章宗母徒單氏其先忒里闌刺人父貞有傳母梁國公主以皇統七年夢神人授以寶珠先燄滿室旣寤而坐經光燭于庭自幼莊重寡言在室令總家事細大畢辦諸男反不及之世宗以

其家法可尚。選爲皇太子妃。大定四年九月。備禮親迎於貞第。上親臨宴。盡歡而罷。對諸王妃公主。稱其容止合度。服飾得中。爾等當法效之。八年七月。將臨尊道宣徽使。移刺神獨幹。賜以名馬寶刀御膳。喻妃以刀。寘左右。願平安得雄有慶。旣而皇孫生。又賜御服佩刀等物。謂太子曰。今幸得孫。觀其骨相不凡。朕爲祖宗社稷大慶。后素謙謹。每畏其家世崇寵。見父母流涕而言。高明之家。古人所忌。願善自保持。其後果以海陵事敗。其遠慮如此。章宗卽位。尊爲皇太后。命稱令旨。更所居仁壽宮。名曰隆慶宮。設衛尉等官。詔有司歲奉金銀錢幣絹綿布疋。他所應用。內庫奉之母。拘其數。上月朝至五六。見事有未安者。必加嚴誡。愈加敬儉。未嘗見喜愠。與諸大長公主加禮。惇睦九族。恩紀皆洽。性好詩書。喜老莊學。純淡清懿。惡聞人過。造次必於禮。故

訕佞之言。無所得入。且恕以容物。逮賴御以和其有生子而母
亡者。視如已出。慈訓無間。御下以公。雖至親無所阿徇。嘗誡諸
姪。皇帝以我故。推恩外家。當盡忠圖報。勿謂小善爲無益。而弗
爲。小惡爲無傷。而弗去。毋藉吾爲可恃。輒肆非違。以干國家常
憲。又因妹并國夫人。嫂涇國夫人等侍側。諭以爾家累葉豐厚。
宜節約財用。吾受天下之養。終不能多取。以富爾之私室。時有
以玉孟進者。却之。且誠以貴異物。而殫財用。非我所欲。我旣賜
予有度。爾輒獻此。何能自給。徒費汝財。我實無用。後勿復爾。明
昌元年。世宗服未終。禮官議以五月奉上册寶。后以禮所未安。
弗許。上屢爲之請。終不忍改服。錦繡佩珠玉。當俟服闋行之。上
因太后執意甚堅。諭有司。其待來年。竟以二年正月崩於隆慶
宮。年四十五。諡曰孝懿。祔塋裕陵。次室劉氏。遊陽人。天眷二

年九月己亥夜其家若見有黃衣女子入其母室中者俄頃而
生性聰慧凡字過目不忘初讀孝經旬日終卷喜佛書世宗爲
東京留守因擊毬見而奇之使于府中見貞懿皇后視其進退
閑雅無恣睢之色大定元年選入東宮逾二年生宣宗是日大
雨震電驚悸得疾尋卒年二十三承安五年初贈昭華宣宗卽
位追尊爲皇太后升祔顯宗廟追謚昭聖皇后貞祐三年十二
月乙未勅贈三代官爵

章宗后蒲察氏上京路哥速河人父鼎壽外戚有傳后始生有
紅光被體移時不退就養於姨冀國公主旣長姿性淑明丰儀
粹穆知讀書爲文孝事冀國一如所生大定二十三年章宗爲
金源郡王行納采禮世宗遣近侍局使徒單懷忠就賜金百兩
銀千兩鹿馬六匹重綵三十端拜命間慶雲見于日側觀者異

之是年十一月備禮親迎詔親王宰執三品已上官及命婦會禮封金源郡王夫人後進封妃生絳王洪裕而薨卽位追冊爲后諡曰欽懷奉安神主于坤寧宮歲時致祭大安初祔塋道陵李氏師兒大定末以監戶女子入宮從宮教張建學誦書故事以青紗隔障蔽內外宮教居障外諸宮女居障內不得面見有不識字及義所疑難皆自障內映紗指以請問宮教自障外口說教之惟師兒聲音清亮易爲領解章宗嘗問宮中教女子誰可教者建不知其誰對曰就中聲音清亮者最優乃以語宦者梁道譽師兒才美勸納之時上好文辭妃性慧黠能作字知文義尤善伺候顏色迎合旨意遂大愛幸明昌四年封爲昭容明年進封淑妃父相及曾祖祖父皆追贈金紫光祿大夫上柱國隴西郡公兄喜兒舊嘗爲盜至是官宣徽使安國軍節度使弟

鐵哥擢近侍局使少府監勢傾朝野射利競進之徒爭趨其門
南京李炳中山李著與通譜系超取顯美胥持國附依以致宰
相怙財固位上下紛然知其姦竊不敢擊雖擊亦莫能去也一
日帝宴宮中優人璵瑁頭戲于前問上國有何符瑞優曰汝不
聞鳳皇見乎若嚮上飛則風雨順時嚮下飛則五穀豐登嚮外
飛則四國來朝嚮裏飛則加官進祿上笑而罷自欽懷后浚中
宮虛位久帝屬意李氏以其微甚大臣臺諫固執不從帝不得
已進封爲元妃其勢位熏赫實與皇后侔時帝以繼嗣未立禱
祀太廟山陵少府監張汝猷因轉對乞遣近臣詣諸岳觀崩析
禱詔遣刑部員外郎完顏匡以往泰和二年八月丁酉元妃生
皇子忒隣羣臣上表稱賀宴五品以上于神龍殿六品以下于
東廡下詔平章政事徒單鎰報謝太廟南北郊右丞完顏匡報

謝山陵遣使亳州報謝太清宮及高禱彌月封爲葛王與世宗
初封同尚書省奏國號並無系屬乃於瀛王下附葛國號十二
月癸酉滿三月勅放僧道度牒三千道設醮于玄真觀爲忒隣
祈福又報謝北嶽弁長白山丁丑御慶和殿浴皇子詔百官用
元旦禮儀進酒稱賀五品以上進禮物生凡二歲而薨及資明
夫人林氏生荆王洪靖諸姬生榮王洪熙英王洪衍壽王洪輝
皆以二三歲或數月輒夭至泰和八年承御賈氏及范氏皆有
娠未及乳月章宗疾頗困素於父兄中最愛衛王永濟欲立爲
繼體元妃語帝此非輕言者及大漸使內侍潘守恒召王守恒
語妃莫大之事當與大臣議乃遣近侍局副使徒單張僧召平
章完顏匡至宣華門外遂與定策始發勘同傳遺詔卽皇帝位
大安元年四月有訴元妃潛計負恩因儲嗣未立令宮人詐作

有身與黃門李新喜竊計欲取他兒假充皇嗣遂於年前閏月十日因賈承御病嘔吐腹中若有積塊妃與其母王盼兒及新喜謀令賈氏詐稱有身俟將臨月於李家取兒以入月日不偶則規別取以爲皇嗣遇章宗崩謀不及行竊呼提點近侍局烏古論慶壽與計因品藻諸王議復不定方先帝疾危數召元妃不到及索衣服亦不卽來曾與其母私竊別議况以平日疾妒遇有幸御令女巫李定奴作紙木人鴛鴦符魘魅致絕聖嗣所爲不軌事旣發露遣大臣按問遂俱欵服命宰臣往審亦如之有司議法當極刑詔以久侍先帝乃與賈氏賜令自盡王盼兒李新喜并喜兒鐵哥等各正典刑仍追除係監籍於遠地安置及衛王被廢宣宗詔言章宗彌留並無完顏匡都提點中外事務勅旨乃匡欲專定策功構致如此朕惟章宗皇帝聖德聰明

豈容有此欺給近因集議武衛軍副使兼提點近侍局完顏達
崔王傅大政德皆言賈氏事內有寃此時達職在近侍政德護
賈氏所以知之朕親臨問左証其事曖昧其李氏及當時被罪
貶責者可俱令放免還家由是其寃始雪

宣宗后王氏中都人父微時嘗夢二玉梳化爲月已而生二女
及沒有芝生千樞宣宗初封翼王章宗詔求民家子以廣繼嗣
時后與麗氏偕入王邸見其姊有姿色又納之貞祐元年九月
封后爲元妃姊爲淑妃麗氏爲真妃后無子淑妃生哀宗養以
爲己子二年七月立爲皇后賜姓溫敦氏姊進元妃追封曾祖
得壽司空冀國公祖璞司徒益國公父彥昌太尉汴國公妣劉
氏楊氏馬氏三國夫人哀宗卽位並尊姊妹爲皇太后妹宮曰
仁聖姊宮曰慈聖進封父南陽郡王受封之日大風昏霾黃氣

充塞天地已而后夢丐者數萬踵其後心甚惡之占者曰后者天下之母百姓貧饑將誰訴焉后遂勅有司京城設粥與藥及壬辰癸巳域河南饑饉元兵圍汴加以大疫汴城之民死者百餘萬后皆目覩焉哀宗釋服將禘饗太廟先期有司奏冕服成上請仁聖慈聖兩太后御內殿因試衣之以見兩宮大悅上更便服奉觴爲壽仁聖諭上曰祖宗初取天下甚不爲易何時使四方承平百姓安樂天子服此法服於中都祖廟行禘饗乎上曰阿婆有此意臣亦何嘗敢忘慈聖太后亦曰恒有此心則見此當有期矣遂酌酒歡然而罷姊性端嚴頗達古今哀宗已立爲皇太子有過尚切責之及卽位始免榷楚一日宮中就食尚器進玉盃椀於后及太子以瑪瑙器進麗氏后見之怒召主者責曰誰令汝妄生分別若非飲食細故必令有司杖殺汝矣是

後宮中奉真妃有加。後有告荆王謀不軌者，下獄議已決。帝言于后，后曰：「汝止一兒，奈何以讒言欲害之？」章宗殺伯與叔，享年不永，皇嗣又絕，何爲欲殺之耶？趣赦出使來見我，移時不至，吾不見汝矣。帝起后立，待王至，涕泣慰撫之。哀宗寵一宮人欲立爲后，后惡其微賤，固命出之，上不得已，命出宮。語使者曰：「爾出東華門，不計何人首遇者，卽賜之黥檢，撤合葬教上騎，鞠后傳旨戒之云：『汝爲人臣，當輔主以正，顧乃教之戲耶？』」再有聞必大杖汝矣。比年小捷，國勢頗振，文士有奏賦頌以聖德，中興爲言。后聞不悅，曰：「帝年少氣銳，無懼心，則驕怠生。今幸一勝，何等中興？」而若輩諂之如是。正大八年九月丙申，崩。諡曰明惠，遺命園陵制度務從儉約。十二月己未，葬汴城迎朔門外五里莊，獻太子墓。西明年被發，遣中官往視，以兵護宮女十人出迎朔門，奉

柩至城下是夜復葬之

哀宗后徒單氏宣宗及太后有疾嘗割膚以進宣宗聞而嘉之
興定四年后父鎮南軍節度使頑僧有罪宣宗以后純孝因曲
赦之聽其致仕正大元年立爲皇后九年帝以河朔失利奔于
歸德京城猶未知正月丁酉夜遣后弟四喜與內臣馬福惠近
侍木甲荅失不奉迎后與仁聖王太后託爲報捷執小黃旗以
入至則奏兩宮以奉迎之意及取柔妃裴滿氏令人張秀藥皇
乳母鞏國夫人等十餘人外皆放遣之又取宮中寶物馬蹄金
四百枚大珠如栗黃者七千枚生金山一龍腦板二及信瑞御
璽仍許賜忠孝軍以兩宮隨行物之半是日召二相人議烏古
孫奴申固諫不可四喜作色曰我奉制旨迎兩宮有敢言不行
者當以別勅從事二相不復敢言行議遂決壬寅太后御仁安

殿出錠金及七寶金洗分賜從行忠孝軍是夜兩宮騎而出至
陳留見城外二三處火起疑有兵遲回間奴申初不欲行卽承
太后旨馳還癸卯入京頤四喜家少頃還宮復議以是夜再往
太后憊於鞍馬不能動遂止明日崔立變四喜獨與妻完顏氏
及塔失不父咬住領忠孝騎卒九十七奪曹門不得出轉陳州
門守者裕州防禦使阿不罕斜合已遁去經歷官完顏合住權
師職麾門卒出四喜等至歸德上驚問兩宮何如二人奏京城
軍變不及入宮上問汝父汝妻何獨得出咸無以荅下之獄皆
斬於市及京城破兩宮諸妃嬪皆北遷不知所終 惟寶符李
氏從至宣德州居摩訶院李氏自入院止寢佛殿中作爲橋旃
會當同后妃北行起龍庭卽於佛像前自縊死書紙于門曰寶
符御侍此處身故後人至其處見其遺跡憐而哀之 舊史贊

曰天子娶后王姬下嫁。豈不重哉。秦漢以來無世世甥舅之家。而關雎之道缺。外戚驕盈。而肅雝之義乖。蓋古者異姓世爵。公侯與天子爲婚姻。他姓不得參焉。女爲王后。已尚王姬。而自貴其貴。富厚不加焉。寵榮不與焉。使漢唐行此道。則無呂氏王氏武氏之難。公主下嫁。各安其分。各得其所矣。金之徒。單孥懶唐。括蒲察裴。滿紇石烈。僕散皆貴族也。天子娶后必于是。公主下嫁必于是。與周之齊紀無異。此婚禮之最得宜者。盛於漢唐矣。